



郎潛集序

郎潛集者

祖臺叅伯縣圃高公所著詩賦

各體諸什也公束髮登朝文章

政事冠冕天下及鎮重藩年未



逾壯詠歌之業宜賡在藻矢周
行為休明鼓吹頌以卽潛命篇
沈鬱紆迴若自托於龐眉之顏
叟者何哉當叟親承主問憮然
叙述自嗟等瑟之忤非有他瓌

璠可動世主也又非有鄉舉墨
妙東方恢瀟嚴徐主父之辨口
聳聽覩也矜頓三朝乃得一官
潛不潛之間未可言遇公烏借
以自托說者曰公年盛而心則

即潛集序
老也眼青而眉則白也大名曲
周之績載循書題殿壁休問烈
烈矣天曹之樹掖垣之梧何所
不足公一枝者而周南之息動
垂數年意公所謂潛者亦猶屈

之騷而揚之玄歟余曰若是則
公著述具在何不為慙屑牢愁
而溫平婉厚風風雅雅無不嫻
於則也蓋其餐霞於天珮蘭於
夜不知有世情炎涼不知有官

階廡薄惟知三山之雲氣可以
盪曾清淮之泄流可以漱齒烏
衣青雀之遺跡可以興懷而寄
概心不受一塵事而詩亦不籠
一陳言洗目滌腸如却烟火之

食而作水月之觀如茹沆瀣之
清氣而吞蓬壺之靈丹惟是典
天為耦則與古自符登矚之章
並秀靈運詠懷之撰比響步兵
其他諸作升堂入奧陳射洪之

高調還雅杜拾遺之佳句驚人
至於樂府古賦盡態極變近轍
江庾遠踪揚馬真備一代之國
工籥四音之元氣卽作者猶不
自知其妙而技至此止矣公生

當黨部分植之時朝議沸羹之
際寘蟻闕蠻觸於不問獨一意
報君永懷靡盬不以揮毫而謝
運甍不以烟月而薄簿書望卽
之譽如星度支之門如水驅車

四國召棠邠黍與澤莪麓樸俱
新東南于是氓有父士有師而
公焚香瀆書垂簾深廨之內不
知其為屏翰貴臣也然則公向
之所為潛者至于見且飛飛且

躍而其所為潛者固在豈悒悒
於散曹而皇皇於遇主者同日
語哉嘗怪元封之主頗稱右文
而任事之臣率取名法武健一
時待詔諸彥求飽金門半囊粟

耳其與顏叟浮沉實無異有如
吾公即據尊踐華尚未躋黃髮
從此調律呂和神人外則彤弓
有錫內則湛露有章然終不失
故吾而於潛無加損也公有語

錄行世盡破漢宋諸儒之陋特
懸渺義津梁後學間從他所見
公偉文大冊四唐兩漢奴驅隸
使而未嘗傲倪一世通脫自喜
有以知公之善用潛即緯武經

文亦若帷燈匣劍公鄉濟南退
舍矣公蓋能為濟南而不為濟
南者自輸自運豎立三界縱橫
萬古而視之小道等之綺語一
以為太虛浮雲一以為覺海浮

漚出天壤而入地文潛天潛地

屈宋臯夔事業文章並茂而人

不能名之潛之時義大矣瀆是
篇者其有以見公之大斯得哉
吳郡治下生馮時可頓首拜

撰



郎潛集目錄

卷一

巳酉除夕攜家在濟縣憶故張明府

元日次韻

過南樂魏道冲太史招飲見貼二作賦答二首

東昌哭臨韓方伯淳寰

上元夜讌官石父吾廬二首

再題石父吾廬

抵家展先公墓作

贈日者安士遜之萊州

宋道岍見示近作數十篇屬為品題不圖技進

贈言驚喜二首

春日酬道岍

遲母輓詩二首

春日恒風

寄候業師范先生

送孫伯玉遊太學

春日左侍御招偕宋長公次公遊南園次韻二

首

春日同宋嘉甫遊廣福寺

春暮張儀部兄弟招同道岍兄弟宴集亭山園

率成四詠

亭山園次道岍韻四首

又作和僕光

久旱幸雨作示田家

春日閒居漫題十絕句

將赴南畱別同遊諸子

高密縣五日作

旅次遣懷二首

感遇二首

過淮陰作

入舟二首

金山寺四首

酌中冷泉

晚憩妙高臺

早登江天閣

真州渡江

龍潭驛阻雨

恭謁 孝陵

夏日同王日損袁滄孺遊天界寺因過訪竹壑

老禪二首

雞鳴寺聚遠亭望後湖

馮虛閣

耘莊賦 有序

題張滄西贈公冊

莆田黃黃門南山精舍雜詠五首

樂志堂

木末橋

聽泉軒

擷華館

水月閣

答王日損七夕見問作

寄題吳徹如雲起樓

焦弱侯太史招隱憑虛閣晚移席亭子望後湖

三首

焦太史惠教佳刻數種率賦爲謝二首

寄訊河南王郡丞二首

答呂虞部益軒

招袁比部太玉呂虞部益軒宴集木末亭二首

玄陽老人引壽周太公

爲石民部賦江月軒

送林止巖使君之汝寧

代視倉務感述

贈李振之三首

送別袁滄孺兄省祖還楚

贈袁童子

送劉勿所給諫還蜀將之閩憲

贈洵水部玄暉

雨中思四首

贈董考功葆元兄

雨中董考功招飲別署

十三夜月

十四夜月

十五夜月

朱太史蘭嶼開園宴集同鄉諸子三首

卷二

入 賀北上畱別同署諸友

看梁塘舖後竹二首

江上吟十篇

舟中道上絕句十三首

過訪邢侍御子愿投贈有序

涿鹿行

贈王進士季木

王季木席上歌

讀文太清明府太微集

東還道上漫題二首

次韻題張太廷尉公墓二首

溫伯堅吳人也僑居膠東予童時見之別久矣

今年至予里相見頗喜詩以送其行

出郊至宣政事

春日喜雨作

春日遊城陽北菴

清明遊竹菴

自竹菴下至龍菴訪雲菴道士

寒食郊行二首

感事二首

哭牛生季章

視西庄別業

後遊亭山園同道岍

宋道岍別業次韻四首

遠招行

春日過故開府孫公古城別墅

南園卽事

寄贈周叔文太學

同張伯行邀高職方仲芳偕齊郭兩文學宴集

亭山園

送高仲芳遊煙霞

遊勞山道中作二首

鶴山

白龍洞

太平宮二首

自太平宮至下宮道上作

下宮二首

觀海印寺故址在下宮西

僊墩

上宮

自上宮步登三十里至巨峰白雲菴

登巨峰頂是勞山絕巔四首

聚僊宮二首

觀海灣打魚歌

華樓二首

石竹澗寺二首

黃石宮二首

大勞觀

寄林民部石壁

五日偕諸子陪天瑞明府遊亭山園流觴列坐

天瑞曰此千秋後又一蘭亭也因賦詩如其體四五言各二篇

又二日再邀諸子陪天瑞飲亭山園

抵鄉料檢舊宅喜若初有漫述志快三首

遊鏡山菴後作

牆草詩

悼亡鶴二首

弔亡鶴賦

有序

秋思三首

促織

螢

鵲

寄靳爾時大叅

寄問天瑞明府二首

時景三首

九月一日

懶性

九日

題邢子愿畫松

卷三

孫氏園天瑞明府餞飲畱別二首

走筆贈吳醫二首

再赴南都別里中親友

膠州趙氏兄弟陪遊匡氏嘉樹園

十月望夕王孝廉兄陪登超然臺謁長公祠臺

為蘇公守密時作

葭莢行

再入南署述事

社集烏龍潭時病不克赴得韻麻字

至日齋居作

冬日謁黃侍中表忠祠

女士行十二韻紀沈相女節孝也

再集冶城分得高字

二得潛字

曹公遠招同寮觀署中臘梅和柯季和

大雨諸子偕過瓦官寺分得佳字十六韻

直宿署中值大雪是冬始見

雪霽用前韻

社中送丁子之蕪湖二絕句

冬莫三絕句

送柯季和之揚州

歲杪徐園讌集用王長公韻二首

贈李本寧先生廿韻

金陵除夕

壬子元日二首

長干樓觀迎春曲時再集魏園六首

初春歸興四首

正月六日招李公本寧同潘景升吳翁晉蔡伯
達曹公遠小集却賦爲贈

社中再送柯季和之維揚題卷二絕

投刺行

咏氣瓶中小金魚二首

金陵元夕篇初唐體

警雷電作

酬鄭應尼讀三子小草見贈之作

梅花塢觀梅五絕句

靈谷寺五里松

答吳翁晉喜晴邀七子郊遊之作

翁晉招遊高座寺看竹軒予以事先還

厲躬詩十六章

登報恩寺塔頂

春署朝晴

半峰菴看玉蘭盛花

良濟集
目錄
春日會西園二首

三月三日社集桃花塢病未能往却作呈諸公
寒食祁爾光招同社友汎舟得花字

烏龍潭汎舟學艷體二首

春將莫行送曹公遠還陽羨

擊楫行送鄒駕部道卿之京

游女行

清涼臺卽席送曹公遠分得魚字二首

何天玉招飲疎園看牡丹

雨後再看疎園牡丹

李本寧詩侈白門之社賦謝十絕句

遷居述興三首

送吳翁晉光祿上計之京

巨源王孫宴坐齋

好脩堂歌贈巨源王孫

初夏南郊讌集分韻四首

城南王氏山林卽事兼贈主人

借史紹卿梁有實兩僚允遊牛首山三首

倒影

風竈

桃花館

祖堂

獻花巖時汪君倩亦至

卷四

天界寺集分得送字

攝山棲霞寺同汪君倩史紹卿賦三首

千佛巖

天開巖

從棲霞趨弘濟行經鱗魚廠二首

燕子磯歌

弘濟寺觀音巖

梅花水

嘉善寺石壁短句

登嘉石閣

幕府寺

達磨洞

山行卽目二首

喜姚百雉至有懷舊會輒贈短韻兼寄張平仲
姚百雉期集鷲峰寺遇吳允兆陳山甫譚菽述
遊爰及存歿各賦近體亦寫鄙悰

五月月夕作

蔡伯達招同臧用甫羅玄甫姚百雉山人集蕉
飲亭卽席送允兆還山分雲時二韻

魏氏兄弟歌

夏至後二日卽事二首

范際明齋頭同僚夜飲
菴竹五章寄壽太青子

海上遊僊詩

伏日徐園避暑時予適未預

送劉載甫謁還汝南

送謝哲甫比部暫還金谿

署亭間題

夏過國華王孫青溪園

送陶開普滿秩之京

漫題

和鄭應尼秋海棠詩二首

木末亭醉歌

贈林茂之山人

九華行贈吳子寬生

秋日亭子遣意

亭夕

秋夜聽榨酒注甕聲

感運六章賦時

不寐

憶故山

城南汎舟行和蔡伯達時偕赴臧用甫之招

翳侯太史招同祁爾光蔡伯達史紹卿遊吉祥

寺遂入山三里看桂叢分得山字

九日工部園亭分得豪字

喜趙季卿宮諭校士至白門

寄懷李考功若蒙

送季卿典試還朝

送邵太史芝南典試還

寄贈董光祿葆元

良濟集
目錄
寄詢鍾伯敬

杪秋同黃貞父邀熊侍御飛卿遊靈谷寺暢飲
至夕陶然有作

送沈尊師之任蜀中僉憲

江上別沈尊師

冬初留春堂山亭賞菊花得真字

貞父招汎淮水分得齊字

冬初歸懷四首

翁侯先生招同貞父應尼遊嘉善寺嘉石閣

梅花水

幕府寺

送吳光祿翁晉請假還里四首

至日雪二首

讀鄭用章紀忠烈錄感賦

冬日永慶寺偕同行步於謝公墩各分賦二首
冬夜同鄭應尼諸公坐貞父齋中次應尼作

喜秦山人京過訪

贈一齋陳子

有序

冬陰同貞父命駕之報恩寺憩石鼎精舍因信步尋玄裝塔縱觀諸幽絕處時偕行馬生巽甫泉上人漫引長句

普德寺新成華嚴樓同過寓目因讀焦太史碑碧峰寺禪室

天界寺同訪竹壑老禪遂過竹居菴小飲晚步萬松菴復題十二韻

二老詠二老名德巋然竝為世師幸獲從遊實勤仰止雖篇章之妄擬要未足知言云爾

焦太史弱侯

李方伯本寧

一逸詩

陳子季立即一齋也

六子詩紀南中冬日一時之交也海內生平無及焉

黃水部貞父

劉比部載甫

柯民部季和

蔡駕部伯達

吳光祿翁晉

鄭水部應尼

金陵看春行

迎春日同史紹卿邀本寧樓上眺望晚飲魏即
西園時本寧枉教前春之作輒依其韻數賡
示同遊

立春後夜同僚凌兄招飲聽公子亭倩彈琴歌
元日雨雪

同黃貞父陸季高溫長卿憑虛閣雪望因就飲

長卿齋中述事

再日貞父招同前客遊五官寺便過顧園還命
酌吳園

焦先生招同貞父載甫紹卿吉祥寺探梅花

燈夕分得佳字十二韻

方胥成二子見過追憶舊遊復檢贈章遂作二
詩弔胥成以示二子

雪中杏花

劉載甫招遊清涼臺

病中贈汪子汪善望氣祿命卜筮之術二首

焦先生招同貞父載甫遊吉祥寺看山中桃花

劉載甫招陪焦先生黃貞父同遊蓮花菴

秦淮禊事四章

舊遊梅花水傷其巖壁之奇以僧寮蔽也予友

黃貞父謀諸焦先生及衆君子撤而易之訖

役復往觀焉幽賸都非曩有喜有此作亦賡

鄭子二首

送周晉明社友之廣南守

陶開普社丈擢守登州喜而有寄

鄭應尼招同劉載甫吳之矩飲齋頭時予及二

客皆將滿行言別分賦得逢字

觀秦淮競渡夜歌

卷五

別焦弱侯夫子

東還畱別同社諸友代柬

贈別貞父四首

次韻答別鄭水部應尼四首

答贈劉載甫比部言別四首

答李本寧贈別之作

答別蔡伯達

短歌酬翁晉

舟泊燕子磯晚登磯上憶舊遊作

江行二首

雨泊高郵

舟月

清江浦泝黃河而上三首

上水遣悶

舟中聞笛二首

答王永啟言別

自鄒之沂入莒作三首

諸城雨夜又竟日兀坐遣意

唐明府招遊超然臺

寄候文天瑞新調伊陽四十韻

除櫻篇

有序

悲昌邑

便訪趙季卿遂以雨留二日

歷城道中

自德州買舟北上紀見三首

鄭州九日

九日晚抵河間

張仲嘉明府招我於肅寧官舍新晤張山人談

長生術口占以贈

由獻縣南行遣興二首

冬晴

冬曉

暮陰

大雪迎春日

歲晏篇

除夕行

甲寅元日

春山二首

贈孫牧之文學二首

寄陶開普使君二首

山黃花賦

有序

上巳日鏡山菴二首

雜感

同周叔文喜雨見寄呈賀令君二首

無錫變

贈地師孫子詒甫

延暉樓初成登覽有述二首

觀西園示獠奴二首

之郡夜宿棲霞公署二首

早行

賓都太虛宮三十韻

太虛宮後雙柏行

入郡呈元暉使君二首

陶使君招飲蓬萊閣上二首

陳公階子太守瑞南兄弟六人招遊城南杏塢

山林率賦五首

梁駕部丹崖席上賦贈

陳封公及子長公兄弟釀酒蓬萊北山下坐珠

璣岬上循西巖於是逸思飄舉放歌三詠焉
出郭二里宿瑞南庄樓是夕海市略見中夜雨
二首

艾山湯泉

方山盛水菴

夏日延暉樓十絕句

陶元暉舉子有贈

田家早秋三首

海港張魚同兄未孩賦

中秋雨簡賀明府

哭亡僕什二首

秋日病懷

秋埜

別元暉使君

南發別內

別叔兄未孩

憫饑

南征四首賡載甫社兄

鄭應尼喜予復來快然有作二首劉載甫輒亦

次韻志喜見貽重感兩兄之意次韻奉答二

首

再直署夜感賦

喜雪望鍾山

雲後張肅之兄招同劉載甫鄭應尼張夢澤飲

龍光山亭子賦二首

冬日鄭應尼招同張肅之劉載甫馬褰生飲署

中次應尼韻

劉載甫招同肅之應尼輩飲胥園和應尼作
除夕肅之復招同載甫輩守歲

卷六

乙卯元日

和王永啟人日看春

題永啟夜遊圖

贈袁度和尚二首

看迎春句

十四日肅之載甫及胥生同詣吳宅登覽因過

沈宅看石出就五柳居品茶晚於國華王孫宅觀燈有作二首

馬生招遊李獻章綠雨園王將軍偕至

馬生客將軍家

賡應尼迎春竹枝詞四首

九里開山歌為張肅之作

靜夜吟

顏伯闇納廣陵姬和應尼四絕句

王永啓招同胡子灝武學葉肇禧中秘林茂之

山人遊蓮花井

葉肇禧招同前客遊嘉善寺晚過梅花水

春日同諸君過後湖作六首

春日雨花臺遊集諸子

晚集清涼臺和鄭應尼兄

送劉駕部玄岫起復北上

題余世奕小有園

貫月查

三題皆園中最勝者

醉山池

海綫

抄春集社友於李氏山園和應尼韻

送顏伯聞暫還

送柯季和假還

過瓦官寺次貞父韻贈玉軒上人

送不我上人南謁峨眉赴吳中丞之招

送張葆生北上秋試葆生父肅之

答馬聚生寅長贈別

答貞父兄贈別二詩

古意酬友人

弱侯先生貞父世兄送別普惠寺二首

張肅之周廣裕張夢澤三比部王永啓王聞脩

兩駕部送別於莫愁湖樓上不勝凄然河梁

之感爰賦古什以寫別悰三首

渡江到浦口史紹卿署中

晚同紹卿坐吸江亭

五日紹卿招遊朱泉二首

是日張守禦君招同紹卿于有飲平山閣二首

次日張君復招同紹卿于有過王氏林亭

江上阻風

桃源縣謠三章

沂州謠四章

延暉樓曙望

樓中坐月

野聞八首

飲酒詩十二首 有序

送董章甫廣文北上春試

病中送張伯行比部北上代面

寄梁有實西安太守

北風行送宋民部道岍北上

送華之孝廉北上春試

寄懷錢國蕃銓司兄國蕃予心卓師弟也

寄懷張考功天都

思親詩效嵇中散

釋懷詩二十章乙卯冬日作

立春後適野

喜敬仲秋捷臘月書到感昔述情二十韻

警命詩四首

後飲酒詩八首

見山中老人

有序

丙辰正月漫興二首

一路哭

販稍謹六章

阻風黃河在桃源縣東十里二首

到官漫述二首

郎潛集目錄

郎潛集卷之一

東海高出孩之著

巳酉除夕携家在濬縣憶故張明府

十年昔醉黎陽月盡室今衝衛水風思舊淚流哀笛
裏望鄉心熟大刀中大伾殘雪封題碣瓠子寒沙宿
野鴻明日春秋三十二二毛已少故人同

元日次韻

客夜同妻女歸心遡朔風思鄉春草外祈歲早雲中
物色催征馬江湖喚別鴻饑年哀怨意忍聽四方同

過南樂魏道冲太史招飲見貽二作賦答

長路過從一駐車春風嘉樹拂居廬候門舊識邀山
簡卽事誰能盡魏舒清白子孫庭礙馬蕭疎風味食
無魚吾曹會合關天意星聚應勤太史書

二

十年意氣愧飛揚視草君才擅柏梁把酒深憑念河
朔聞琴只似憶山陽明光春色隨鷓鴣建業風流見
鳳凰

時將適南

懽別匆匆還一哭途窮徹底阮生狂

東昌哭臨韓方伯淳寰

皇天益難問白日忽東傾山海埋風色星辰隕石聲
斯文待後死中道失先生食報偏無子銜哀欲喪明
路人聞罷市野哭可崩城伯道尤堪憤東門恨豈平
鳳凰尚池館蛟蜃自妖精天地陰霾短風霆怒鬪驚
絲綸捧漢殿鼎鼐倚商羹畿輔淹旌節兒童帶姓名
據牀參佐會下榻士紳迎奇術思丹藥消中仰露莖
汲公原借重李密早陳情眼爲 朝廷赤身經骨肉
更鄰家吹笛暮後事蓋棺輕馬援門生思羊曇醉客
行荒涼驃騎第蕪沒菟裘營庭草春風綠源花澗水

晴氣應還象緯世已少公卿築室知無處空餘淚血
橫

上元夜讌官石父吾廬

佳節名園會煙燈暈絳紗圖書鄴侯秘竹石贊皇誇
客醉金樽月春先玉樹花夜闌散珠斗恍似赤城霞

二

急管春風度繁燈細雪迴雜花薰酒入奇石障橋開
蘿薜幽人事柴桑傲吏才快遊憐旅思鞍馬漫相催
再題石父吾廬

卜居負郭能幽絕丘壑人間隔薜蘿密構東西春雪
住奇亭日夜白雲多惟應枚馬愁難賦間許求羊醉
一過梁苑習池稱富貴山霞海市敵如何

抵家展先公墓作

春晝荒荒迷野馬東風吹泣向叢峩三年苦柏堪時
長幾樹啼烏向夕多生子尚懸泉下望遷官始復里
中過淒涼一哭知安適腹痛迴車無奈何

贈日者安士遜之萊州

松菊遲歸怨年來出處更賈生逢季主漢使問君平

歲月閒相妬頭顱壯已驚春風足遊子芳草惹深情
宋道岍見示近作數十篇屬爲品題不圖技進

贈言驚喜

宋玉饒奇辨居然正始還剖應知白璧藏只待名山
王孟宜方駕羊何共掩關深論雅頌則三百擬誰刪

二

比舍幾相失洋洋大國風青天談欲暝春草句偏工
謬許論文似將母拙宦同不妨過往數避世在牆東
春日訓道岍

小雨高齋靜終風避地宜種蘭親護棘行藥但循籬
會面旬朝數科頭歲月期頑疎休苦問同調好憐誰

遲母輓詩

總帷縹緲儼靈旗阿母還應認此兒不欲人間知有
我定看天上識爲誰

二

蕭蕭雪霰滿疎林腸斷郎君寸草心烏鵲自啼庭際
樹忍聞啞啞舊時音

春日恒風

良淮集 卷一
今春好閒適無賴只天風值閑有餘候佳辰強半空
黃沙搖白柳赤日間青虹花事東皇妬浮生歲月中

寄候業師范先生

傳經十五載相憶色常溫夫子能無念諸生不及門
春秋遲未厭德業隱逾尊爲愛馬融帳春花鶯語喧
送孫伯玉遊太學

鶯鳴花雨送良朋獻賦公車接跡升 天子定應驚
主父諸儒慎莫老孫弘春風漢苑垂鞭過落日燕臺
醉酒登再見桓榮稽古力詞場不許更憑陵

春日左侍御招偕宋長公次公遊南園次韻

城臨春圃迴閣貯紫霞深鶯語繁銷日花枝密送陰
細雲席上下返照野浮沉丘壑誰差勝風塵自不侵
二

東山愜吾意近郭俯迴溪野鶴閒修羽花驄矯鑿蹄
興憐三雅竝句待二難題他日追隨願春風百遍攜
春日同宋嘉甫遊廣福寺

巒勢騫文鷲河流隱劫沙上方興廢數淨土往來賒
夜雨龍依樹山春鳥哢花與君俱幻相不著羨袈裟

春暮張儀部兄弟招同道岼兄弟宴集亭山園

率成四詠

名園富雲構奇勝惟負郭掩帶反幽深葱蒨一丘壑
長林映沙岼松聲走垠嶠半壁空青飛遠亭虛白落
修羽羣相呼細鱗夕陽躍密香生谷蘭餘春殿靈藥
主人靜者侶映發如花萼而多素心朋夙諧歡賞約
佳期此一時古人不可作少長庶偕適詠歌獲我樂

二

皆山無不愜吾意愛溪水迢然濠上思枕流更洗耳

儵魚聽醉呼沙鳧沉復起春樹繞微茫返照斂重綺
美勝又日新有酒清且旨何用遊帝王抱此足老矣

三

名花敵傾國百畝連錦叢霞擬天台散水將桃源同
佳麗二三月赤日兼狂風艷色不自保零落誰爲通
西施困春紗憔悴寧吳宮惟有羣飛燕差池戲其中
對酒坐自惜聊照酡顏紅

四

張翰輕富貴安石隱東山亦有數株柳白雲冥掩關

名賢一良聚觴詠嘉且閒吁何計陳迹歡娛及盛年
憶我豸冠時遊茲辟疆園賦詩人不知初松有及肩
再來秋月白復共春華鮮亭閣深古碧垂楊上參天
人其何以堪攬之涕泫然思隨葛許輩此地試求僊
顧慙羈絆衆默默未能言

亭山園次道岍韻四首

野色臨高閣虛風落綺筵屏寒松柏雨盃淨薜蘿煙
細逕分籬斷春畦抱井圓囂塵憐市眼應接轉茫然

二

息機漢陰叟抱甕足幽棲山豁春城隱天平夕樹低
流觴憶陳跡奪錦快新題雙燕鈎簾語當尊細落泥

三

季鷹歸後適鹿豕日爲羣沙淨明湖鑑山深足練雲
牡丹風片片蛺蝶雨紛紛竹葉涼如洗風塵了不聞

四

席藉雲腴輦山迴石徑嶮聊爲嘉樹賦如對輞川圖
嫩柳舒青眼明花醉艷鬚相看各盡意不必在江湖
又作和僕光

日暝連春嶂天長俯遠林壺樽移淺渚雲水漾輕陰
燈助名花艷香聞細草深共論莊惠達未識樂魚心

久旱幸雨作示田家

人身同天地舒慘惟一氣久燠髮膚燥病如中酒醉
春作良亦苦田青不蓋地來牟掩風沙品物色憔悴
夜中山出雲食頃嘉雨泊鳥雀揚和音草木始醒寐
沾浹本無私潤灑庶未匱足知造物心不自言美利
老農傾葫蘆相賀免失墜里居始耕鑿新粟視昔貴
仕宦車生耳止足難得意其孰爲之然亦有盈虧義

農圃仗爾曹豐樂幸一遂永共雞豚鄰次比耰鋤事
在古吾里仁周卹隨所致父祖及我世指困誼無二
尚悅爾曹真帝力忘其自預吟蟋蟀篇歲暮以深喟
春日閒居漫題十絕句

雲物入山多異風塵浮海差禁世情反覆局面古意
瀟灑琴心

二

三歲驅馳二室一春悵望三山休論去住何意爾爾
遊戲人間

三

世上眯眼糝粹雲中接足雞犬人生夢夢幾何酒責
多多益善

四

閉門流水漸臺隱几斜陽送杯黃鳥相求互語青山
一片飛來

五

渴龍不如尺蠖甘帶從他卽蛆藥圃夕陽孤照菊畦
細雨親鋤

六

青松晚歲始貞白水新期貴淡爲報衆人莫疑可憐
知己不憾

七

龍臥孔明暍死蛇從介子耆乾教人感傷千古所以
逢萌掛冠

八

鄉里兢兢月旦耆賢落落星辰古人四十歎逝我願
千萬求鄰

九

朝雨牛羊出村春溪花柳尋源彈碁甘負罰酒譜墨
長吟閉門

十

十五佳人出桑如雲錦帶生光誰令目成相誤始解
魂銷恨郎

將赴南畱別同遊諸子

薰風太劇倦游絲車馬傳觴醉路岐負却素心浮海
事憐將傲骨渡江時爲於家國惴身世可惜親朋生

別離莫問離亭沾灑日松筠無恙待歸期

高密縣五日作

三日辭家近驚心反顧中佳辰僮僕報悵別女兒同
山縣蒲依綠村籬槿燒紅龍舟天下競奈可雨兼風
旅次遣懷二首

中歲厭遠遊而又蒸暑會幸無妻孥聒于役免狼狽
經過邑里主大抵季孟待豈云供屏屨有時輿馬殆
丈夫見齟齬疣贅何能快貴當佩六印賤則安韋帶
胡爲中結束冗長曹郎內天馬非豢畜大魚去淺瀨

仰秣或掛鈎得匪饑渴害浮雲日夜多我車驚星邁
所冀涓埃殫微尚在解蛻古賢突未黔挂冠亦已外
君子佇澄清小人甘禍敗天道庶回斡憂生託一慨

二

沿沂隨潮汐洪濤殷地開蜃市時聞作雲氣如青苔
樓觀露飛僊飄然舉金杯回首鎬池君縹緲瑯琊臺
鞭石有出血驅之盡東來射殺海大魚海神圖風雷
玉泉鳧鴈滅宮闕空蓬萊至今妖男女不見一人回
蓮峰升赤霞登眺迴悠哉南行日照野玄鶴翔崔嵬

怒雨過不時靈駕隱徘徊願隨滄海長長揖謝塵埃

感遇二首

南山潦水波草綠淮河地清晨逢驅牛毛焦皆墮淚
却望水中者浮沉惟仰鼻而獨何臯尤饑罷老更悴
文犧諒無用殺戮焉足避低頭嚙野蒿哀鳴悲風至
欲問介葛盧傷心不忍視

二

沉沉江上蘋搖搖一葦航數程同所見層巒如連牆
魚蝦盡細微鯤鮪不得藏顧惟吞舟者江海空茫茫

龜龍無復出生成日交戕聖人實階厲吾欲問三皇
過淮陰作

淮陰憑軼壯心隨雲物蒼涼萬古思天子東南空厭
氣王孫饑餓固無奇山河繚繞帆檣隱市井喧囂簫
鼓疑漂母荒祠行子拜那緣望報使人悲

入舟二首

執熱巾車甚懷抱幾於盡入舟盪百憂江湖興初引
淮黃衆水盛夏雲鬱輪困堤蟠無名木岬動垂根筍
逆風簫鼓凝背日魚網準沙燕語掠檣夕雨吟疎蚓

渴虹接棹遠飽帆瞥眼緊獨行一灑落終然謝饑窘
仕宦非其情浩然又不忍本從蹈海士出處自矛盾
擊楫照予影意氣徒蠢蠢胡爲長約結空令高人晒

二

炎暉揚輝赫二儀扇洪鑪豐沛芒碭間氣如龍蛇無
弔古一慷慨空悲霸業徂明發寶應渚夕泊高郵湖
衣裳汗厭浥菰蔣鬱焦枯火雲蒸地沸魚休裂肌膚
晚霞石岬生變幻爍斯須嘒嘒大隄蜩站站迴檣烏
喧雷蚊蚋市吮嗜吁更茶遠遊違夙志興盡默踟躕

鳴榔引漁火中夜答嘯呼露電忽刻灑對我清思孤

金山寺四首

名剎蟠江腹孤峰入太空波濤生地底呼吸與天通
樹暗廣陵雨帆歸瓜步風已知身世澹鏡相有無中

二

上頭竟須到忽爾壯心降雲雨垂虛棟藤蘿裊隙牕
沙痕石擁寺塔影月翻江靜對諸天幻青熒引夜缸

三

落日湧中流明霞漾遠洲綺光連北固電影劃邗溝

四

天下中泠水江南六代秋恍如登彼岬萬古了浮漚
江闊煙分樹潮平水逆沙快遊逢寶積清夢臥靈槎
熱腦醒鐘響明心洗井華無言思面壁不用演三車
酌中泠泉

茲泉名第一一軟生清風底似金莖掌虛清本在空
晚憩妙高臺

紫霞吞吐大江開瓜步孤帆落日迴山色遠隨鷗一
點幽然都到妙高臺

早登江天閣

江閣蒼茫帶潤州日銜層塔翠微流却看孤嶼濤連
雪倒影焦山一片浮

真州渡江

一葦飄危渡風雲五月陰戒禊空有意擊楫更何心
波豈斬蛟赤石憐如馬深還題避雨處既濟一長吟

龍潭驛阻雨

魂定渡江危江濤古驛欹風雷驚自折僮僕慰還悲
靜夜蛟龍語閒房蚊蚋饑垂堂憐薄宦非敢厭驅馳

恭謁 孝陵

開闢三王後陵原一代思玉龜春自動朱鳳曉相隨
他日空攀鼎微臣願侍祠重玄甘露既常灑萬年枝
夏日同王日損袁滄孺遊天界寺因過訪竹壑

老禪

松柏陰陰網翠微戒壇花影弄斜暉江聲湧唄龍初
返草色垂簾雉不飛

二

背巘修竹俯層空蓮社蕭然無酒同共道許詢名理

勝那將饒舌惱支公

雞鳴寺聚遠亭望後湖

亭高銜睥睨湖闊接崑崙半嶺松杉落中流日月吞
龜鼉戲塔影烏鵲到河源衰颯蒲荷色天風滿白門

馮虛閣

危閣緣空起登臨萬古情三山凭咫尺九市歷逢迎
雨色陰鐘阜江聲撼石城不思吾土美便欲御風行

耘莊賦

有序

黔南石民部天成君封公號耘莊其自寓也
聞之封公倣儻有玄識迺脫徒纓綉棲心蓬

藁耘寄我也我寄耘也是殆古之至人也已
予受教天成因得尚論封公而為之賦庶令
後世稱述焉
曰耘隱者也

耘莊子放志乎無營之鄉棲神乎不貸之圃藝長生
之苗粗神穀之府道爾相羊爰得其所渺不異人而
獨食母客有從之遊者質曰聖人修身以善世達士
立命以懷寶奚以之而耘是託且耘有道乎耘莊子
曰有夫雨露因乎天時種稂相乎地宜鎡基選乎人
事稂祥消乎歲穢此其大祗也若夫迷陽菴菴薈蔚
殷綸我田既臧疏耰孔分譬之牧然臧穀耘耘去害

良澤集 卷一
鞭後而我無勤課芟柞之罔訾傷靡蕪之滋蔓去莫
若盡思過半哉又觀夫草菹蒨蒨在遠自如芝蘭雖
馨當戶必鋤履道所託惟厥攸居玩鷦鷯於茗葦籍
白鳥於江湖通乎此者斯其庶乎肥遯抑見晰於三
隅者矣客曰吾子之言富矣悉矣難殫述矣卽尋樂
端其事非一願爲吾子畢之爾乃春日遲遲芳卉祁
祁啾啾兮糜鹿覘眈兮黃鸝錢鏞俶載東崦西菑膏
雨潤畦朝暎射籬方買畚而覲僊亦荷篠而迎曦迨
於熙陽引景芷蘭有香群女如雲醜邁於桑羅桂影

兮從微風嫉光眇兮薄太陽宛其相值詩悅禮防悅
倚杖而忽遠息美蔭於枕櫛亦有暑谷巖薛磅礴岼
崕葛藟葦茸桂樹蒙密修蛇燿爚山獬弼疾對之不
驚穠裘比櫛爰擊壤而長謔自移橙而播稔嬖姍稍
汗巘洞日出厥惟聯窈瓊田參離芝囿銅鼓晨鳴媒
雉隱雌垂虹兮飲畚神瀟兮穿竇飄颻射干葱蒨紅
豆襪襖影於靈湫白壁隨乎揮耨審管華之割席信
遺榮之同臭爰及大火旣流莎雞入屋胡繩紉佩芙
蓉隳服斯陵困而陵倉載實穎而實粟金液雲精旨

口刻目乃爲雞黍速骨肉抗首破顏支頤嶽嶽於是
吟猿喞和白雲相逐翔道德之林休神明之谷躡赤
霞以高躅望君子之如玉斯其至也是故易始耒耜
詩詠蟋蟀良士申其瞿瞿介石幾於終日鄭谷題之
以愚鹿門遺之以逸耘乎耘乎亦丈人之所託而石
隱之足術與耘莊子爲間曰吾少也蓋嘗離跂爲仁
義恒慮其弱喪而亡歸退而之乎廣莫之野驚乎泆
漫之希吾知免夫滅劣之報而遑恤夫小人之譏也
乎哉於是抱膝而歌曰有丹者壑有枚有竹遠追帶

索披褐懷玉今我不樂歲是遄逝耘莊之野羲皇世
優哉游兮以卒歲

題張澮西贈公冊

名家食舊德未艾發祥初教授家爲政衣冠世守書
清疑姑射雪閒釣澮河魚關朗知深解龐公道不虛
五雲看氣色三釜思何如尚友欣先哲題詩重憶渠

莆田黃黃門南山精舍雜詠五首

舍近靈巖寺

樂志堂

爾樂在何所一丘復一壑悟到無生時翻憐昔人著

木末橋

登橋俯鏡空魚樂知有無只恐昇僊去溪連九鯉湖

聽泉軒

流泉響浮玉清亦比君子君子以洗心高人可礪齒

擷華館

幽館橙香熟秋天荔子丹山精聽書罷忘却被人看

水月閣

水月渺何許月波翻在空坐飄金粟子似覺有微風

答王日損七夕見問作

同舍相憐意題詩問酒徒翩翩七夕會颯颯二毛孤
虹駕隨天女青溪嫁小姑拋他桃葉渡不近莫愁湖

寄題吳徹如雲起樓

林壑深陽羨樓空萬象分江山秋雨翠枕簟夕陽薰
小徑斜通竹幽牕密出雲看君湖海氣難下白鷗羣
焦弱侯太史招飲憑虛閣晚移席亭子望後湖
秋淨招提境開襟霧忽披追隨慙小友德業卽吾師
雲氣冶城落江聲吳苑悲溪談竟飛動听喜附心知

二

紺宇飄金相玄湖俯鏡光霞標巢鶴塔日掛斷魚梁
鍾阜風煙古臺城草木蒼聞君方便說恍矣悟舟航

三

琴尊茲地勝萬樹醉斜曛解易聞焦貢譚玄薄子雲
洲蓮含鷺影沙草著鷺群鐘磬飄然合寒江靜更聞
焦太史惠教佳刻數種率賦為謝

名山不用閱名家叢桂幽芳玉樹華只合草玄千載
賞同時綠底有侯芭

二

寶劔焜煌字湛盧緣之一雙明月珠夜夜冶城望北
斗光芒不獨詫風胡

寄訊河南王郡丞

王君督理福藩又奏績最故句及之

三年參佐與翱翔岐路縱橫淚數行比歲維藩成邾
鄆聞君奏最入明光秋天草色連吳苑夜雨鐘聲落
景陽惆悵銅駝街上月美人縹緲隔西方

二

白門疎柳薄寒生夜月蘭芬入夢清懷袖舊題紈扇
作彈冠共慶績書成風流江左差宜宦畱滯周南不

良濟集 卷一
為名健飯高堂新拜寵為憐捧檄倚廬情

答呂虞部益軒

交臂生平莫逆歡聯翩騎馬向長干題詩不負酬高
適枉駕時能過呂安竝坐自惟慙倚玉同心固合契
如蘭深憐意氣時危裏鄭重休嗟行路難

招袁比部太玉呂虞部益軒宴集木禾亭

天高亭廠夕陽喧樹杪雲霞互吐吞江浦晚潮迴舊
壘鍾陵欲雨濕清尊人家六代烏衣巷王氣千秋白
露園紅土傷心秋草碧荒祠何處弔忠魂

亭即方正學祠

二

江聲搖落石城秋對酒當歌切莫愁睥睨近連紅燒
亂浮圖高接翠微流青驄野席羣遊騎白鷺秋帆晚
繫洲為愛同心偕靜者雨花飛盡澹悠悠

亭南對雨花臺

玄陽老人引壽周太公

玄陽老人世莫知其為玉虛之賓偶然驂鶴而來下
要當遊戲一萬八千春遂乘元化出入變幻而無垠
人徒見其要眇瞿澤康且悅兮妄擬彭壽與莊椿翺
翔南服兮披褐懷寶壯遊金陵兮六朝芳草噉鍾山

之白膠飲聞風之石腦孰知其極今後天而老重日
渾胚光兮玄以黃 皇嘉運兮萬歲昌玄陽老人應
壽康

爲石民部賦江月軒

南服雲霞集市囂江飛練影月平潮百年樓閣看雙
鬢萬里煙嵐帶二橋鷗鷺相親陪把釣鼉鼉不去聽
吹簫壯遊乘興知難得世繼名家豈寂寥

送林止巖使君之汝寧

同心同舍晚相逢惜別沾襟感慨重懸瓠秋雲迎五

馬廣陵寒雨判雙龍風流江國人如玉月旦天中戶
可封臥理但看桐柏樹可能無夢景陽鐘

代視倉務感述

閒曹日班班懷刺恥所向承乏一治粟兀然塞虛曠
吏人文無害庶期會計當才短時自哂無他衆或諒
爲郎主恩優少年競跌宕秋雨泣紅豆歸興生感愴
遊山眷謝暉日飲師袁盎風塵遂丘壑聊爾諧微尚
勗我素心友何以答嘉貺

贈李振之三首

白露秦淮河天宇薄淒清秋雨啼蟋蟀夜巖石頭城
寒燈兩人對晤言同門生昔別不知時壯老互相驚
豈伊嬰世累拙宦固同聲脈脈以屏營歡愛在合并
愧無芳草貽聊爲長干行

二

舉世夫何屈之子抗高節冥心契無始造化符神哲
遂證周髀誤亦晰渾儀闕智真見星辰身可致稷契
陸沉北復南胡爲遠朝列有才多刺眼古人憤視舌
與君同素心毋然計巧拙所恨道揆微反側憂心惓

三

南國靡蕪多雨色陰澤蘭江聲來席上虛帷生薄寒
庭樹葉時下萬籟聞鐘山秋氣欺遠客內結獨無言
天風吹我衣燕雀行知還共兄卽骨肉且復酒杯乾
送別袁滄孺兄省祖還楚

苦切陳情令伯同寒江遠道授衣中秋風佳興還衰
粲盡日清談憶阿戎

袁有寧馨兒

郢客國中聞白雪鄂王

城外落丹楓遙憐夜雨聽雞起回首荒雲滿晉宮

贈袁童子

渥洼信龍媒神物始爲駒七日已超母霑汗霏赤珠
豈惟厭羈勒恥受牧圉芻萬里當一息長鳴顧天衢
願得隨八駿黃澤以馳驅關山日歎沫老馬空知途
班班駕鼓車仰風徒酸吁

送劉勿所給諫還蜀將之閩憲

巴江西遡粵東巡安穩飄飄寵辱身南北時俱逢斥
馬寬仁上未厭批鱗賈生早斷安危計汲黯皆知
社稷臣自愧曹丘輕季布股肱還見召書新

贈陶水部玄暉

水部才名百尺樓桂叢風雨秣陵秋西江雲物飛天
目北海音書隔石頭弔古時時悲晉壘登高隱隱識
吳鈞與君同歲方傾蓋去住縱橫轉益愁

雨中思

展轉不成寐芭蕉點點自數遙閨拜月罷也夢江南雨
二
積苔生綠華階上揚哀音如聞金石奏忽忽感琴心
三

江漲東冶亭風迴吹笛步幽人無處招徒倚攀叢樹

四

枯條知夜雨獨宿知天寒牀頭孤劍嘯夢裏作龍看
贈董考功葆元兄

靡蕪江晚白雲繁未絕心知山巨源粉署併聯蘭秀
夕版曹秋倚桂叢昏客譚風月情偏洽啓有文章道
益尊惆悵庭柯疎雨內蕭然日閉問奇門

雨中董考功招飲別署

涼風南國夕百卉悽廣墀煙雨景陽樹官闕相蔽虧
登望望僊閣江喧睥睨欹鍾陵隔紫霧水竹自參差

輕波接太液殘荷冒漣漪白動呆愚出青浮叵羅持
開襟萬古意澹蕩有所思西園盛高讌賓主皆能詩
因之一感慨興文歡賞時北海酒不空達者良如斯
十三夜月

秋雨彌朔旬月自十三始不知遠閨人蛾眉幾回死
舉酒向月臨高臺煙冥桂樹涼風來劃然天地合虛
清如再開羿娥不復返天人亦相妬不然陳宮吳館
今何處年年江南月偏照玉鈎斜上樹

十四夜月

白門江似雪玄湖水如月石城初收鐵甕雨煙氛濛濛出還沒有客況有酒對此清魄逼毛髮夜鵲無聲向東發怨歌誰子空勞勞金閨相望夢大刀願言乘之歸去廣陵濤

十五夜月

湛湛秋雨飛江楓青苔黯黹浮雲同故鄉或有月不肯來照金陵中雨花臺畔泣荆榛結綺樓頭翠黛顰姮娥瑤闕獨愁思羞對六朝歌舞人

朱太史蘭嶠閒園宴集同鄉諸子

新竹如雲立名園不日成天連牛首寺江急石頭城
淳朴同鄉意清真太史情小溪回暝色纖月此中生

二

寒風吹鐵甕秋雨望鍾陵簡易何妨禮過從不擇朋
晚花欹枕嗅俯樹接橋登天際看鴻鵠浮生好避矰

三

賸客定教迷何須醉似泥開池互向背隔樹失東西
柴几延香霧櫺牕駐倦霓細看秋草靜物理固應齊

郎潛集卷之一

郎潛集卷之二

東海高出孩之著

入 賀北上畱別同署諸友

衰草勞勞惜別亭天南兄弟眼偏青不緣比舍憐同
調豈有離尊怪獨醒柳岍帆檣秋發發楓江風雨晝
冥冥北衝鴈影燕山暮來往相望一使星

看梁塘鋪後竹

冥冥三百尺掩帶秋色碧一片江南山飛來亂相射

二

候館大江濱修篁千箇新秀色餐可飽尤佳無主人

江上吟十篇

庚戌杪秋以使事渡江北行觸緒
興懷爰及篇什不復詮次云爾

五月暮來九月去僕僕如此一何遽行邁依遲感霜
露肉食實愧涓塵助天動淒清無一物遠近參差丹
碧樹渡江擊楫亦草草海門浩蕩接歸路四載行一
覲 闕庭葵藿之晞小臣慕出處何心委諸趣衣單
野陰日將暮

二

水車宛轉如曲虹輪輻巧接輕縱送秋埂側臥葑田
盛可憐此物棄不用潢潦淹塞雲滿眼丈人誰者猶
抱甕差勝綆短施汲長羸瓶不恥中煩傷

三

江田杭稻風香新江雨初霽雲粼粼野蟲吟號白鷺
立赤脚腰鎌群婦人敢辭辛苦事場圃米豆陵倉始
精神傳聞山東旱蝗甚道逢鄉里語頗真仕宦升斗
卽不薄驕語拂衣或憂貧不爾但看百姓勤嗚呼年
饑可憐百姓勤

四

廣陵秋波奔膠浩孤帆逆牽靡衰草垂岍蒲柳天與
永隔湖屋舍雲相抱瑟瑟時物壯過老松柏爲薪亦
不保舟子作勞歌耶許漁婦褰裳挽寒藻自從剗木
聖者勤世事因之有顛倒古時鳥獸交汎濫民不往
來應更好卽聞路旁千人唱與萬人謳使我侘傺頓
生今古之離憂

五

蘆花倒影波披離乾鵲來迴鳴船桅北風吹鬢鴈南

至紅葉徐下如有思城邑倦遊遙歸路地主不見客
喜之惡草得具亦足飽候吏館人相誕欺浮生野漁
可爭席顧茲一笑何嫌疑

六

湖風閶閶寒瀨秋吳兒若神習操舟衆看子女長駭
浪亦慣雞犬狎陽侯一葉飄颻百歲家不愁換酒足
魚蝦或時一飯蘆中人吹簫者誰泣蒹葭姓名何必
鴟夷子婚嫁隨緣行老矣醉卽柳根繫艇臥誰見武
陵之津桃花水

七

小星織月墮江滸繁華夜喧鐘以鼓楚俗剽雜利三
倍遠集東西南北賈不聞熙熙攘攘世難較貪廉競
三五又況近歲生理迫天下刀錐瀆官府萬物淒其
索若秋遂令市道行公輔長謠忽激涼飈發落葉灑
燈紛如雨

八

洲有宿莽岬有楓江草隱花嬌晚紅道周蒺藜獨後
死我車日行荆棘中荆棘不敢問勞止亦無恨苦蓼

朝茵各一時誰其謝榮又何怨涼露厭浥濡我衣將
進酒歌以勸願今來日三百萬

九

江介恒風豚魚拜鷁首軋軋過淺瀨雲深岬滑錦纜
遲霜降石露漁網曬短日桑柘影依依持螯高歌遠
將歸此地前朝有勝敗兀然不知誰是非

十

淮陰百城何壯哉控帶節制連中台風雷山川爲之
動駕馭亦足稱雄才福生或有使禍至豈無胎驕貴

寵賂身乃災何況脛股大相擬過慮臂指不爲使聖
言盱豫亢有悔胡不聞焉忽至理君子戰栗固有以
黃水濁淮水清清濁日夜東北傾我復何言去矣行
舟中道上絕句
湖闊天低浪與平垂舟官柳夕煙橫蘆花宿鴈依遲
冷萍葉翻魚撲刺驚

二

初月霜清鼓柁間難教酒氣上愁顏何人夜半吹簫
急直使江潮怒似山

三

急汰凝帆送夕曛清歌進酒轉行雲玉肪不敵吳兒
白畫舫羅衫擁鄂君

四

廣陵女子名天下過客停舟還繫馬一月佯羞有幾
回嫁時郎細看真假

五

靡蕪澹澹秋雲渚移棹沽魚雪白女新妝畏客却低
頭論直心成不聞語

六

杲日霜明惱青楓三朝逆水兼逆風自憐不似隨陽
鳥五月南征十月東

七

桃源縣北黃河流波浪驚翻艤子舟請聽公無渡河
曲教人腸斷聞箜篌

八

九日驅車徑古城戰雲黏草野陰平登高回首英雄
地還聽兒童說弟兄

九

柳葉堆堤霜壓舟若爲江北最先秋總無風雨憎重
九滿眼衰天也自愁

十

村曠山童野草黃天清馬放逐牛羊丈人相敬供雞
黍漸喜方言似故鄉

十一

不辨小東還大東石墻草屋村村同溪清倒映鷺兒
白林淨遙飛柿子紅

十二

十月江南未改衣秋風張翰憶尊歸可兒僮僕能知
喜恰及霜時蟹正肥

十三

東籬手種幾枝菊不見苞英當見花無數道傍開爛
熳小牕獨對碧欄斜

過訪邢侍御子愿投贈 有序

庚戌十月余以使事適臨邑未舍館投刺謁
子愿寒疾輒呼余就視榻前子愿傾筐倒篋
若不能盡之一語余罔然無所措說因相與
商畧下上移夜命酌余少飲輒醉方圖贈章

四韻

十年今得御龍門下榻還空北海尊海內一人真不
憾斯文千古重須論興酣評許狂奴在調合翻憐大
雅存却愧昔賢稱小友惟因明月更畱髡

涿鹿行

涿鹿道上塵百丈黃沙搖翳山川障行子役役不自
苦旁觀爲之色惆悵秃眉膠鬚友不識彷彿耳鳴鈴
聲亟赤肚句兒啼號無氣力車難安席屢起式豈無
豪門大酒肉棄餘暴殄誰分食伏軾瞪視三歎息吁

嗟仕宦風塵長安中方諸行子將母同

贈王進士季木

名家如岱宗千秋望齊魯之子颺繼起磊落驅今古
詞賦小天下高視曠狎主突兀見黃初小兒揚德祖
中原一相遇我抃君起舞所願北面時他人莫敢侮
烈士已然諾何況遜心許此道式微久勉旃振鐘鼓

王季木席上歌

燕臺婀娜誰家樓名賢聲氣聊相求置酒徵歌繁白
雪急觴緩語增客愁宮闕參差斜日靜冰霜岑寂野

陰浮時危安得致身去調合無論拂衣休大呂不見
空磨室黃金已矣荒薊丘君看易水長城下依舊蕭
蕭東北流

讀文太清明府太微

韋編中道絕聖遠見何及西方代有作薪火傳曾伋
微言挾一綫天河歛起立嶽嶽太華蓮恐觸真宰泣
東還道上漫題

饑年見流冗吾道亦艱虞歸許兒童迂行憐婦女呼
冰堅爭度馬雪跡印行烏候館蕭涼甚長吟旅思孤

二

一歲三還里冬深易路窮馬鳴悲短棧鴈遠下虛弓
遙白浮峰雪空青墮海風古人憐僕僕涉世媿能工

次韻題張大廷尉公墓

騷裏麒麟臥雪天祁連遙象勢眠芊望中金粟南山
合照入瓊泉北斗懸卽爾庭階誇謝氏後來經術繼
韋賢佳哉鬱鬱葱葱氣風送靈旗爲颯然

二

蓬萊掩映見高臺馬鬣天成萬象開丁令還來問華

表茂先曾是映中台雲封瓜地鶴初化雨過楓林龍
乍迴不盡登高懷仰止郢歌聊和宋生才

山名三台墓枕其中

溫伯堅吳人也僑居膠東余童時見之別久矣

今年至余里相見頗喜詩以送其行

伊昔初相見余時弱好弄憐君美無度逸阮猶伯仲
令我心眼開歛覺情識動談諧無不可破的爭百中
那知雨散後十五年如夢再逢山之阿傾倒申祝頌
我壯君則老閱世感慨重稍喜酒健在屢乾比舍甕
東南信多才譬彼石田用北遊長兒女齊語轉被諷

雪深不其館沙晶夕潮凍匹馬悵何適聊遣天風送
出郊至宣政寺

閒居正月暇兀兀思寥廓驅車臨近垆出門卽豁落
陰融雪背溼雲沒日垂脚堤柳颺柔綠間鳴獨棲鵲
古寺振風鈴白日無今昨憩息有餘地已謂解束縛
投境卽異觀豈不由心作暮煙起石壁置此深住著

春日喜雨作

冬時不雪應愁麥春雨頻佳兼易晴清動野籬如著
色潤凝嘉樹細聞聲微知午霽班鳩語自得山情布

穀耕田里親朋期載酒相求作伴聽嚶鳴

春日遊城陽北菴

陽景紆餘地迴崎不容車谷口入無罅恐有子真居
怪石怒向人挂杖亦牽裾溪清鑿鬚眉忘機不驚魚
樹木悅早春飛花笑自如坐攬草色碧却避風隧虛
奇嶮罷登頓血肉爲累予達人託放誕天地一蘧廬
信此可銷憂適來得其初

清明遊竹菴

袂襖清佳日山鳥欣朋輩好奇及筋力緣陟踏人背

磊落欲墮石貫穿憩其內細竹拂危確清泉觸而碎
空海掛眼底鼇蜃迴多態岨嶇何嶙峋東走鞭策待
香聞異藥秀僻見修蛇蛻快意杏花風飄然吹我帶
突兀胸次隨翩舉形骸礙春事復餘幾擲却誰能奈
自竹菴下至龍菴訪雲菴道士

大鳥立如人石上凝夕昏驅之不肯去風雨生巖根
蓬萊亦咫尺真人目擊存入山四十年坐穿木榻痕
玄陽露鼻端相視無妄言雙顴映瞳發氣如三月溫
有時卽絕粒綿綿默吐吞形穢大人對識寡自傷魂

阮生得嘯傲叔夜空著論春華已汗漫歸誤青雲繁
寒食郊行

春風無不可寒食更悠哉煙火人家暝鞦韆女伴迴
花光逐燕至草色上衣來晴媚差強雨游絲倦未開
二

遊騎嘶相應春閨笑忽聞氣酣花自妥溪靜柳如醺
風俗猶傳禊年華只益墳試參齊物理哀樂若爲分
感事

道路隨年易田園閱主更窮村艱乞火小市聚呼兒

蠻觸紛紜甚鷲花爛熳生春深鮑魚肆禁得日崢嶸
二

聖人日恭默吾道屬逡巡多口存言體攢眉臥老臣
漢容不先過秦莫謂無人安穩東山客深畱屐齒春
哭牛生季章

翩翩信公子逸氣薄層霄緬辱通家契彌知別路遙
山河紛雨雪歲序改星杓往者逢河朔歡言幾夜朝
再經醉燕市興盡轉蕭條訃信不時至夢魂猶自聊
五年把袂訣百世蓋棺消麟鳳難爲瑞龍蛇或踐妖

生平肝膽已師友典刑饒通籍仍懷寶傳書擬報瑤
伊人可慟哭後死日飄颻戒酒應懲逝亡琴永絕調
太行一片石漂水早春潮哀郢憐吾道青天泣大招
視西庄別業

楊柳嫋嫋東風顛桃花杏葉爭可憐連朝劇睡粗省
事別業載酒初相鮮喬木高樓烏鵲喜平川斜港鷺
鷗眠小娃如玉歌勸酒休負腰肢春色前

後遊亭山園同道岍

憐春春破門未出只待桃紅鷺語時便與煙巒添斌

媚細教風雨費禁持水流清寫琴心遠石湧孤垂展
齒疑此地百年幾回醉看山一度數行詩

宋道岬別業次韻

春事村村有桃花細澗中野濃香自迴山宛翠還同
耕鑿暄和日籓籬質朴風爲欣高士得幽賸果能窮

二

雲深容抱膝客少省梳頭鷺燕新年事松梧異世丘
好拚春色醉莫代古人愁興盡斜陽眼閒情任去留

三

僻巷牛羊熟低檐燕雀深牕風虛響答山雨小寒侵
勸酒花爭笑聽歌魚忽沉浮雲看仕宦應識邴生心

四

驢背頻來往楊枝裊裊春空青拂片石軟碧藉重茵
賓客閒鷗怪衣冠野父嗔他時樹木大老隱共清真

遠招行

城北何纍纍馬羊亂荆杞石人列十二立臥闕首趾
深穴塌秋雨高臺亦傾矣知是何代墳斷碑辨宮氏
緬想趨會葬赫熠千夫侈都歸黃土中貴賤盡此理

良渚集 卷二
丘隴莽荒夷白骨狐鼯喜黃鳥棲野棠悲風來不止
牛山涕千秋雍門歎至此浩歌復酌酒遠魂招難起
因之悟今昔眷言二三子

春日過故開府孫公古城別墅

春風蛺蝶野籬乾蹊徑成行大樹盤舊日園丁猶抱
甕偶來詞客一憑欄葳蕤燕舞高樓鎖寂寞鶯啼廢
井榦相怨垂楊恁作意游絲偏挽冶遊鞍

南園卽事

圓轆轤流石淙旋賒春酒浸甕缸女郎歌笑恰十

五燕子差池纔一雙較射風翎鳴急絕藏鈎花勝賭
難降自知疎散宜調謔偷覩東鄰碧玉牕

寄贈周叔文太學

憶在髻齒餘聞君美如玉遂使巷無人蘭芬常集服
豈謂阻會面半生如轉燭天馬恥廝養國香久媚谷
出處等浮雲內慙空食肉惠音時復來楚然振幽獨
丈夫意氣許世人大橫目敢薦木李誠不嗔未同瀆
二牢勤夢寐十日飲不足預申東道期傾倒以相勗
同張伯行邀高職方仲芳偕齊郭兩文學宴集

亭山園

佳客遠尋棲逸侶名園不負數遊人見驚翠靄縱橫
出已讓繁花開落頻杖底孤峰懸片雨樽前二仲醉
餘春偏長載伎徵歌日昏黑還疑石齒新

送高仲芳遊煙霞

瑞煙巖畔曾振衣清風嶺頭多翠微苦憶深春子規
叫足知今日道士非松枝別我年年古竹杖隨君緩
緩歸陳跡壁書應尚濕誰教飛動興虛違

遊勞山道中作

平生遊癖劇不遠屢爲期忽憶讀書日宛如前世時
形容近難識筋力後虞衰莫負青春事山花笑許隨

二

出門病旋已馬首戴春花天柱雙峰卓風帆一點斜
君平非避世向子卽辭家千載青蓮後誰人臥紫霞

余十七讀書卽墨城中屢欲遊未果在莒卽十六年矣天柱山名

鶴山

到山猶問訊石路細如髮樹蒙草根滑登頓屢結襪
早闕豁落勢海潮送殘月聲撼長松標天吳見出沒

瀕浮茲山靈迴立疑艱
崑巖洞存想像僊跡亦銷歇
始軻已愜當嘯歌時聞發
終念屏塵營了願煉金骨

白龍洞

入僻不辨方遂疑非人境
僊橋憑虛構龍潭轉深靚
泓碧澹無塵岼花映空影
懸石絕倚著直上雲蘿頂
道士久冥棲默坐觀溟
滓服氣著金色不言微有省
嗟爾餐霞侶翩翩御風冷
俯睨大夢世飄轉一沉梗
偶然思古初長謔擊木瘦

太平宮

密樹俯躋攀虛涵滄海間
藤蘿怒獅石風雨暝龍灣
暮鳥投花隱山童斲藥還
駐顏應有術解道不如閒

二

日出田橫島潮迴不夜城
濤聲懸殿閣雲氣結蓬瀛
夢寐疑前世虛空卽太清
奇峰相拱揖下界異陰晴
自太平宮至下宮道上作

大海插山足路轉神悸怯
側併磨蟻旋俯當鏡文疊
石礙循迹迷蹊交枉渚
涉密林挂巾墮急灘攝衣躡
野花布如席幽芬襲蜨蝶
紅紫成畝畦欲坐欣所愜

海鳴空石應沙岼沾紫蛙網罟集惟時飄然歸一葉
 遠引遊目騁險臨健步接腦減頭忽搖鬚添白已鐳
 問道思還丹望洋願維楫安得乘浮景浩蕩天路躡
 下宮
 峻嶒山勢入無垠潮泊雲根瀨氣新錦石繁花天上
 出珠宮疎樹鏡中真春濃已負看魚鳥海吼時聞怒
 鬼神悵望安期生不見况疑風雨下僊人

二

青霞碧島氣霏微眩眼空明白羽飛道士銖衣翻藏

坐僊靈虹駕步虛歸水雲市遠連鼇起藥草春深秣
 馬肥最好更尋餐玉訣長繩難挽欲斜暉

觀海印寺故址在下宮西

寺為僧德清所營頗極體勢之壯羽流懟

之上疏得報逮僧論戍寺以是毀令人感歎焉

笙鶴千春地黃金間劫沙諸天彌蔓草大地覆苔花
 龍象驅何迹牛羊牧已嗟苾芻啼古樹羽士種胡麻
 伊昔聞多事因緣意太奢莊嚴存具體功德涉生涯
 開鑿秦丁力崇宏魏闕賒雷霆天有耳墉屋鼠無牙
 予奪宜如此流行亦一家泉猶飛卓錫星直貫浮槎

使者青鸞翼真人白鹿車
 野花藏醉蝶異藥護蟠蛇
 階趾埋簷雷牆隅斷石華
 驚濤侵岬動倒影避巖斜
 估舶春潮漲漁舟夜火遮
 問名知錦貝食淡采靈芽
 興廢關情妄山川閱世遐
 百年生露菌四月熟王瓜
 觀海身俱幻求僊事近誇
 津梁思寶筏默坐吸歸霞

僊墩

橫海孤峰片石分浪花
 吹萬捲鷺羣朝瞰倒射千重
 影返照晴披五色文翠削
 凌虛穿溟泮青涵視下覺
 氤氳僊人六箸還相戲
 亂摘星辰擲落曛

上宮

有白牡丹一株枯久道人夢一白衣女子
 來云此我故居也次日生蘂矣句內及之

古觀棲靈樹連枝拂短牆
 雲根滋秀草日氣暈扶桑
 紫殿蛇行亂丹爐鼠跡荒
 牡丹魂入夢戴勝語來房
 碑版看磨滅煙霞自混茫
 春風動杖履瀟灑滿衣裳
 自上宮步登三十里至巨峰
 白雲菴

壯年體頑癡不習筋骨勞
 陟險披榛莽趨捷羨猿猱
 膝顛相支拄踵背躡兒曹
 樹交避巨石澗響殷春濤
 累頰白雲低益信青天高
 待後矜自健引興直爲豪
 漉漉暗淙飛晰晰新羽嘈
 步重繭生足臉赤汗流尻

兀然得憩息道人進濁醪香聞白蜜脾倦把紫芋毛
萬峰互奔騰勢欲舉神鼇虛風傳谷籟泠泠如雲噉
擾擾半生間利欲久煎熬願得輕身術乘鶴翔九臯
登巨峰頂是勞山絕巔

萬仞憑虛洞壑重孤高秀擢綠芙蓉建標石上棲歸
鶴倚絕松根抱螿龍應接轉看紅蕖亂開穿初破紫
苔封罨風吹我如飄羽擬向蓬萊問赤松

二

冥冥滄海氣雄哉萬里扶桑倒影來天地盪摩通晝

夜雲煙吞吐見樓臺千林礙日侵相射三秀無人隱
自開爲訪僊橋驅石遠惡風疑送祖龍迴

三

曉霧迷離野望寬天風故借海濤寒春樵穿石丁丁
應大鳥垂雲剡剡看咫尺似通青帝座飄飄一笑白
雲端自憐凡骨艱僊遇寥落浮生竟寡歡

四

峻極東華凌太虛僊人聞道好樓居金光自秀山靈
草嶽影遙浮海大魚石室未開鴻寶秘天門常護玉

函書青天短髮行搔遍叫嘯在捫西日車

聚僊宮

碑殘尚可識記自太平年雙樹此其始君看長拂天
二

平疇散碧溪古殿枕奇石苔斑久無人一步一畱迹

觀海灣打魚歌

初月潮滿煙靄空白日奈可數天風巨筏櫂比排青
濛競狎天吳奪鮫宮神駭目曠洪濤中須臾景返如
歸鴻銀刀翻側雪山堆奇形幻譎鬼神同一年惟此

時網罟密春絲夕陽照沙肆喧逐萬人馳任使鳥攫
客取不直錢驢馱車載紛差池亦有同出而異獲事
無伎害莫相疑鱗腸腥腐誰可當過者掩鼻久亦忘
首夏炎熱逐臭地少年富貴追歡場倚門女子雖麤
醜紅鞵翠袖凝風光日博魚蝦喫幾頓還送村沽如
蜜香借問來觀者誰子早發天門夕至此胸貯勞山
千壑紫醞雞擾擾胡爲爾海水一洗可去矣

華樓

翠巘層霄絳節瞻清虛海色映疎檐何人對博丹梯

仗似有吹笙碧落巖玉女洗頭天液灑金莖擢掌夜
雲霑欲憑佳興凌風去塵世空嗟白鬢添

二

樓臺剡灑紫庭扃融結僊宮萬象冥千樹斜曛沉忽
白百花春霧睡難醒何年遺蛻畱丹竈有客翻經倚
翠屏瀟灑青雲看咫尺長松根臥古碑銘

石竹澗寺

漸老林青杏子肥杖邊石齒挂人衣蕭然古寺依雙
樹竹外朝晴白鳥飛

二

春溪石逕一僧還香像旃檀敗屋間海上那能無彼
岍蓮臺應且破慈顏

黃石宮

路絕穿雲洞崖根液石泉甘凝鍾乳白窈入貝宮玄
古樹高僊掌靈芽膩女拳振衣堪脫屣問道果何年

二

黃石祠仍在青泥事不無海偏書傳略地勝帝天都
松老蛇常穴雲迷鶴互呼緬懷隨許靖何事累妻孥

大勞觀

入山就險塞轉路得茂蔚薊桐柏林密植兼棗栗
深溪觸哀石綠疇交葱鬱馬上滌塵襟勞脛涼至膝
晚飯脫粟飽巘端繫斜日松脂代明燭花氣成崖蜜
獨遊謝賓侶喜無此俗物賞遇不借人酒肉使心怵
淡旬苦病脫豁茲耳目畢明發大道上車馬如蟻蝨
惆悵風淚酸恍惚默自失

寄林民部石壁

同舍過從切歸田意氣酣論文對彈劔失計慙抽簪

恨別人應兩聽更夜每三緘題知苦熱雷雨大江南
五日偕諸子陪天瑞明府遊亭山園流觴列坐
天瑞曰此千秋後又一蘭亭也因賦詩如其
體四五言各二篇

蕭蕭幽亭秩秩賓筵和風四扇朱火媚鮮仰聆嚶林
俯悅泳川肆志遺形契道忘年

二

薰風旣滌流水載濡解愠斯歌續命有符浮沉雖異
離合孰渝嘉哉式燕二難與俱

五言

平林敷萬榮丹霞蔽長原
寓目齊古契乘化脫世藩
怨屈徒齋志達周希放言
我侯布嘉惠合并樂難諼

二

蒲尊柔碧美蘭臯輕綠浮
節序歡處處今古同悠悠
微風翼沙燕曲池潛暝鷗
達化觀無始共此適天遊

又二日再邀諸子陪天瑞飲亭山園

朱明白日長城隅激通隈
樗火照顏色丹渥時倚頽
賢侯政休暇羣彥復遑陪
偃室不厭至徐榻意悠哉

清言披四座薰風松間來
賦詩西園讌避暑河朔杯
方之足千古古人多相哈
酒肉鄙陳思袁紹匪通才
繁吹徹雲表車子轉喉哀
荷華揚秀芬林端露月胎
密樹間聞語暝色拂高臺
沙明石忽斷野豁天再開
臨川攬逝化壺觴靜徘徊
良愧迷謬質賡奏拙所裁
抵鄉料檢舊宅喜若初有
漫述志快

四松亦能大三徑自吾廬
宦跡底多繫生涯緣爾疎
苔文不去壁瓜苦尚依除
宛似柴桑里無勞更卜居

二

城遠交遊少鄰稀子姓繁養雞不出巷種樹日過園
百遍披衣懶三朝釀酒渾尚憐頑骨健笑舞故相喧

三

閉門飛鼠舞新雨小魚嬉歸及麥秋日遲知瓜熟期
買山信非達避地獨能宜折翅憐雙鶴行行自解隨

遊鏡山菴後作

不盡先人思藏名在澗衡築茅三十載大樹一千名
未必封君比堪知隱士情鹿門遺已遠魚沼後應成
山水如憐別松梧解作迎菁葱分氣色應接轉崢嶸

數見尤鮮異相知對茂清披榛霑露藥尋藥折雲莖
僊李枝間墮紅泉石底生雛鷺懸墜羽野雉矯雄鳴
少事身何累忘機物不驚幾椽風雨庇久坐骨毛輕
自古林園富如人代謝更偶然聊得有舍汝意誰明
丘壑私天地衣冠狎鑿耕百年憐棄物五月卽秋聲
潦倒披衣臥躋攀折屐行起予弘景愛先得謝安精
海市連峰落晴雷瀑布傾况疑槎上客母處訪君平

牆草詩

陰積苔痕深青青覆牆頭黍稷祗半實小草獨修修

茅茹亦可把瓜蔓風前柔託根良不殊造化奚德尤
短葉無喬榦寄生沮洳秋飛蟲閉虛院忽復螢火流
八月宵已長感歎聊當遊月出細照戶持杯聽農謳

悼亡鶴

憐爾雲霄翮飛來亦夙緣偏然矜白羽何處夢青田
飲啄雌雄日庭除十二年因傷垂翅後逾識道林賢

二

脉脉難自得不知身出門幾年如故舊相失忽乾坤
睨汝那忍視無緣招遠魂哀歌亦當哭寂寞過西園

弔亡鶴賦

有序

庚子之歲二鶴止于曲梁之野野人以獻予
軒而歸之庭除馴狎十有二年已各損一翅
已而雌者病足隻立久而不任遂絕其脛流
血以死夫桑下之宿猶謂生情況有知者乎
鄉園寡歡若偶故人忽失其侶哀悼可知乃
惟而瘞之西園為封焉賦以述感亦下招焉

噫嗟鶴兮汝何為兮辭雲霄之九阡循泥滓而下之
兮聽鳴臯之謬戾竭在陰之爾縻洵予政嘉以黽勉
兮噫爾謀稻梁其德衰爾其頂含赭丹羽截玄雲胸
如束素項蟠貝文豈偶野鷺不入雞羣矐矐兮歛飛而
掣足練瑩兮迴立而奪秋旻聲應宮商步中規矩舞

則蹈節食必鳴侶精沕沕兮其有思聽乙乙兮孰愁
予諒乘軒之匪榮劇千里而就之喟六翮之已鍛奄
幽恻而生離矯鼓翼以悲吟翩連蜷柔德而執雌爰
下堂而斌媚焱乍往而倏來中衝壯而罔愉兮神憤
怵以震愴諗顛頷其莫能明兮愒折翅余又奚憾收
靜志而諦視兮鴿雀嘈聒而不禁雄者余要之戇兮
聊戢翼以抑音惋余嬰疾以毒距兮增予而淚淫
魂逖沉以黜黜兮霜露交兮哀江南越張啄而伸臆
跂向人以如訴翥驟奮而難翔俯拾粒而却嗟吉凶
之徵兮莫知其故絕筋挽吭兮訣絕朝露噫嘻時命
兮孰擇小大食子之惠兮中道隕廢北山頰兮蒼其
園園有棗兮叢有蘭孤塚兮焦鬱林風兮月闌怵孤
雄之求侶聲哀厲而天寒若良朋之永乖惻擣絕乎
肺肝匪伊鳥之婉孌怒情至而汎瀾庶靈魂之審集
體清虛以來還亂曰汝相不適誤浮丘兮至則無媒
返何咍兮北山張置南有羅兮東則弱海西流沙兮
魂何歸兮化令威兮慘兮懣兮天以風兮匪風發兮
我心怛兮

秋思

寒莽蔽天地號風厲我樹悲哉湖海客惻念在中路
靡蕪萬里深況也懷行露之子故入夢明月時驚顧
促織煩哀響衷腸不能訴海白動疎牕雞鳴野煙聚
誰知蓬蒿底有人獨愁慕

二

夜中孤鶴泣哀聲墮清霜感之不能寐攬衣起彷徨
仙翮旣終鍛怨彼天路長皓羽沾白露低徊庭中央
月色對素影自顧如相將悲風鳴梧桐矯頸思高翔

忽焉心內熱憂來浩無方

三

歲功旣云畢塲圃甫積薪莽白潢潦野游氣薄衰旻
鳥雀養羞日低羣嘈荒榛伊何幽谷士曾阿獨爾親
混迹以耦俱薜荔若有人折茅但自把結蘭故不紉
憶昔論交時意氣難具陳

促織

蕙草悲日夕淒風盈我懷如何促織響轉側音書乖
隙月欲窺戶遠砧聞上階情生那關物底苦控形骸

螢

樓靜牕斜月村疎野墮星蚤時聞過鴈八月始流螢
翅弱經露白光微含火青乍低開幔入復掩碧紗屏

鵲

七夕不爾見天河真待伊雄飛合如此肉食亦堪嗤
毛禿蓬蒿日巢傾風雨枝世人憐遠信相誑轉狐疑

寄靳爾時大參

省憲論才德業新大東遷擢袞衣均何緣結綬懽娛
久憶昨班荆意氣真不注芙蓉傳太白皓湖風雨謁

于鱗山中蘿薜悲秋客悵望千春念有鄰

寄問天瑞明甫

秋色泥人只欲睡蕭辰雲樹劇空寥側聞臥閣轉相
憶不待觀濤還自聊時至百川朝海若政清三月避
陽喬疎村撼促驚雙鬢叢桂依然記見招

二

藜杖出門秋草萋相思百里野雲低往來不厭書頻
至填委無妨藥解攜風月有客獨長歎村墟羣鳥多
夜啼却晒行藏非隱者直教詞賦干虹霓

時景

澹日風高南鴈驚
熒熒雲白遠波清
端居默自思人
世羈旅其堪念
友生物色蓬蒿憐
老大寒涼天地太
崢嶸
簷鳩瓦雀知何意
故逐低羣劇噪鳴

二

靜對細君依
暝坐高樓月出見
西山蛛絲背燈時
上鬢螢火隔帷還
照顏彭澤攢眉惟
欲醉東方割肉一
何頑爲憐燕子將
辭社繫足相期明
歲還

三

年年詞客慣悲秋
八月潮生萬里流
昨見新詩王季
木宛如長慶白江
州雲霄晰晰天雞
舞荇藻輝輝赤
鯉遊閒理釣絲
吟詠罷溪萍山葉
且深愁

九月一日

前夜雨多兼日風
稀微玉露野棠紅
晚農穫稻雲物
塞遠圃築茅廩
鹿同憶看難
兄菊盆盛奈無
良友酒杯空
海人時餽秋蝦
美何讓尊鱸
故國中

懶性

懶性秋閒又索居
白雲常恁伴吾廬
愛眠省事只耽

酒多病好忘難讀書鷗浴沙羣浮日動鶴鳴鐘響落
霜虛已知天地欺狂客鏡裏蕭蕭鬢影疎

九日

幽偏寂寂忘重九況復菊花無一枝盡日徘徊惟比
舍百年蹤跡偶東籬登臺不是望鄉國隱几那應惱
歲時只待白衣還一醉山妻相笑帽頻欹

題邢子愿畫松

託根非秦岱移植或徂徠靜聽虛牖曉有聲如殷雷
郎潛集卷之二

